



Program Penanaman 2,000 pokok bakau yang dianjurkan oleh Institut Pengajian Sains Sosial (IPSAS), Universiti Putra Malaysia (UPM) dengan kerjasama Yayasan Axiata di Pulau Ketam, Klang, Selangor baru-baru ini.

(Foto ihsan UPM)

UPM, Yayasan Axiata tanam 2,000 pokok bakau

Klang: Universiti Putra Malaysia (UPM) melalui Institut Pengajian Sains Sosial (IPSAS) menganjurkan program penanaman 2,000 pokok bakau di Pulau Ketam, Klang, Selangor, baru-baru ini.

Program dengan kerjasama Yayasan Axiata itu menyokong agenda Kesihatan Planet sejajar dengan Matlamat Pembangunan Lestari (SDG) oleh UPM bagi manfaat masyarakat.

Timbalan Naib Canselor (Jaringan Industri dan Masyarakat), UPM, Prof Dr Ir Hang Tuah Baharudin, berkata projek ini membuktikan komitmen UPM dalam agenda Kesihatan Planet bagi menangani isu kelestarian

alam sekitar.

“Projek ini turut mendidik generasi muda mengenai kepentingan hutan paya bakau, yang dianggap sebagai nurseri ekosistem akuatik untuk keseimbangan ekosistem serta sumber makanan negara.

“Ia juga mencerminkan pendekatan lestari universiti yang berteraskan komuniti melalui galakan kerjasama antara masyarakat tempatan, penyelidik dan agensi kerajaan,” katanya.

Hang Tuah berkata, program ini turut menyokong usaha Kementerian Sumber Asli dan Kelestarian Alam (NRES) melalui ‘Kempen Penanaman 100 Juta Pokok’ di seluruh negara.